

Regenza ha «cumplaina confidenza» en Repower

La regenza prenda posiziun tar la dumonda parlamentara da la fracziun socialdemocratica

DA MARTIN CABALZAR

■ **En connex cun dumondas brisantas ch'occupeschian actualmain l'energia ha il chantun Grischun savens dus chapès. El è savens concessiunari, autoritad da concessiun ed acziunari en il medem mument. Quai savess magari manar a conflicts d'interess, uschia cunzunt era tar la Repower.** Quest mal-esser ha motivà deputà *Johannes Pfenniger* (ps Tumleastga) d'inoltrar en num da la fracziun socialdemocratica ina dumonda parlamentara davart questa problematica. Questa situaziun è daventada anc pli virulenta per il chantun tras la nova structura, tras il project «Futuro» e tras la nova orientaziun fundamentala da Repower.

Il chantun Grischun n'ha betg mo pers ils ultims onns radund 260 milliuns sco acziunari da Repower, el è cun ina participaziun da radund 22 pertschient er betg pli acziunari principal. Concretain ha vulì savair Pfenniger tge pussaivladads ch'il chantun ha da far valair ses interess en il rom da la nova structura d'acziunaris, tge effects che la nova situaziun da Repower ha sin il return da las ovras idraulicas al vegl proprietari (Heimfall) e sin las plazzas da lavur en la periferia. La fracziun socialdemocratica è da l'avis che la direcziun operativa da Repower haja «da responsar ina part considerabla dals resultats dischagreabels dals ultims onns». Ed ella sa dumonda sche la cumposiziun actuala saja empermettenta avunda per realisar la nova strategia e sche l'indemnisaziun dal schef operativ sia commensurada en vista al nausch andament da gestiun. Dumondas criticas datti per ils socialdemocrats er en connex cun la liquiditad a lunga vista e cun la participaziun da Repower a l'energia nucleara.

Ina sfida tant per l'interpresa sco per il chantun

Per la regenza èsi incontestabel che la nova orientaziun da Repower vegn caracterisada d'ina gronda dinamica tant en l'ambient politic sco economic sin il champ d'energia. Questa nova orientaziun saja tant per l'interpresa sco per il chantun ina gronda sfida. Sco acziunari principal disponia il chantun vinavant d'ina participaziun substanziala da 21,96 pertschient. Cun duas persunas grischunas saja il chantun era vinavant bain represchentà en il cussegl d'administraziun da Repower, uschia che ses interess sajan garantids, manaja la regenza.

Er en connex cun la crudada als concessiunaris na vesa la regenza nagin impediment dals interess dal chantun e da las vischnancas envers Repower. Ils puncts centrals da la strategia da return als concessiunaris sajan cuntegnids en il rapport davart la politica d'electricitad dal chantun Grischun. Tenor la regenza

vegna a dar ils proxims onns numerus returns als concessiunaris. La decisiun respectiva, sch'il chantun e las vischnancas concessiunaras duain far diever d'ina pussaivladad da participaziun, u la decisiun per in u l'auter gener da cuntinuaziun vegnia mintgamai premdida sin basa d'in giudicament cumplessiv dal cas concret, uschia er en cas da la Repower.

La Repower è francada bain en il Grischun

Tenor la regenza è la Repower francada bain en il Grischun. Mo gia per motifs tecnicos (gestiun e mantegniment dals stabiliments da rait e da produzioni) sto l'interpresa esser represchentada cun ses personal e cun estructuras decentralas en ils lieus nua ch'ella è activa. Co che las singulas filialas en il Grischun sa sviluppan dependia er da la realisaziun da la strategia da l'interpresa en detagl e da las midadas sin il martgà. La segirada da las plazzas da lavur e da las forzas specialisa-

das correspondentas en la periferia dependia la finala er da cundiziuns generalas attractivas e dal fatg che l'interpresa sa sviluppa vinavant en moda positiva.

Cumplaina confidenza en la direcziun ed en il cussegl d'administraziun

En sia resposta punctuescha la regenza che l'occupaziun da la direcziun è chausa dal cussegl d'administraziun. La regenza na va betg d'accord cun l'opiniun dals interpellants ch'els «resultats dischagreabels» derivian decisivmain da faussas valitaziuns da la direcziun operativa. Gist en il temp il pli difficil ha la direcziun cumprovà ch'ella lavura cun cleras finamiras vi da la realisaziun da la strategia ch'è vegnida concludida dal cussegl d'administraziun e che vegn sustegnida dals acziunaris principals. Malgrà che la situaziun dal martgà è anc adina ina sfida è ella sin buna via cun la strategia. Cun la nova strategia ha la Repower – tenor la persuasiun da la regenza – premdi la dre-

tga via per daventar pli independenta dal pretsch d'electricitad absolut. Dal rest sajan ils problems actuals da la branscha il motiv principal per la situaziun actuala – quai mussia clerain er la situaziun tar autras interpresas.

Er en la dumonda da la salarisaziun dal schef operativ sustegn la regenza la decisiun dal cussegl administrativ: «Resguardond las sfidas sin il martgà ed ils sforzs extraordinaris en quest connex sa chatta l'indemnisaziun dal CEO e da la direcziun strategica en ina dimensiun cumparegliabla er en la cumparegliaziun da la branscha. Il cussegl d'administraziun stat serradamain davos la strategia da la Repower.»

La strategia cumpiglia er l'alienaziun da las pitschnas participaziuns a l'energia nucleara. Vi da quest plan n'è sa midà nagut. Els detagls en chausa èn fixads en la cunvegna confidenziala da transacziun ch'è vegnida concludida l'onn 2016 tranter ils acziunaris principals.

Situaziun finanziaria è uss stabila

Tenor il giudicat da la regenza è la situaziun finanziaria da Repower uss stabila suenter l'augment da chapital. La quota d'agen chapital cuntanscha – tenor las cifras publicadas a chaschun da la clusiu da mez onn – la valur fitg solida da 47 pertschient. Ultra da quai ha la Repower ina liquiditad netta. Stentas per agids transitorics da vart dal chantun n'èn mai stadas e na stattan betg en discussiun.

Tranter ils acziunaris principals exista in contract d'obligaziuns per acziunaris, sco quai eria er pli baud. Las cunvegns cuntegnidas en tal correspundian als mecanisems usitads tranter acziunaris gronds e na prevesian ni per ils acziunaris principals ni per la societad restricziuns nunusitadas, punctuescha la regenza concludend.



Sco acziunari principal da Repower ha il chantun Grischun pers ils ultims onns blers daners. MAD